

瓊山縣志卷之二

輿地志三

氣候

風候潮候占歷附

地居炎方多熱少寒秋冬雷水土無他惡

方輿志

瓊與中州絕異素無霜雪冬不凍寒草木不凋四

時花果水土無他惡惟黎崙中有瘴氣鄉人八

其地即成寒熱李西美廣南攝生方論云嶺南

□海地沈燠陽之氣常泄陰濕之氣常盛陽氣

泄故四時常花三冬無雪一歲之間蒸熱過半

一日之內氣候屢變晝則多燠夜則多寒天晴

則燠陰雨則寒此寒熱瘴癘所繇作也然瓊內

以垣下蓄嵐蒸外以海洩其菀氣氣候較他郡

瓊山縣志

卷二

輿地三

氣候

一

頗善大抵其熱以炎蒸其寒以風雨其生常早

其肅常遲天以陽施地以溫感是謂炎蒸其常

也故曰四時皆是夏風噓而噏雖夏亦寒其暫

也故曰一雨便成秋其生常早如正月桃花二

月螻蛄鳴蚯蚓出王瓜生苦菜秀之類然生而

不力氣常宣泄也其肅常遲如九月禾乃登十

月水始涸蟄蟲坏戶草木黃落之類然肅而不

嚴氣不收斂也

舊志

廣志曰南方地氣暑熱一歲田三熟冬種春熟春

種夏熟秋種冬熟今惟瓊郡則然

徐堅初學記

按一歲三熟乃外國禾種使然

黃通志自宋播占城禾種今有

三熟亦不盡闕暑熱然今瓊山低田以冬種夏收爲小熟夏種秋收爲大熟一歲二收高田則有大熟無小熟一歲一收并無一歲三熟者

由羊城而高雷冬可以不裘一變也又高雷而瓊臺冬可以衣葛可以搖扇又一變矣惟其地在炎方土卑而薄霜雪之嚴遠不能相故一歲之間暑熱過半而五月爲甚諺云熱不過芒種夏至寒莫若小寒次寒此氣候之所以與中土異

也

參萬州志

嶺南之地愆陽所積暑溼所居風雨燠寒罕應其候故蒸變而爲瘴癘瘴有四候青草黃梅瘴於

瓊山縣志

卷二

輿地三 氣候

二

春夏新木黃茅瘴於秋冬而深山窮谷之中檳榔花開其瘴尤酷行者觸之卽生疾病故唐宋時以儋崖諸州爲仕宦畏途然此亦惟地近黎峯民居寥落之區則然耳今則生齒浩繁險隘盡闕微但近郡地氣稍舒諸瘴未有卽西黎林灣等圖向之稱爲瘴鄉者亦漸歸於清淑矣

參郝

通志

按海南瘴氣以五六月爲甚此雖山澤爲之亦氣候之過也郝志以木樨開時爲香花瘴謂其氣尤酷毒易中人信然木樨秋後方開瘴已稍舒且此本本地絕少不如檳榔彌山徧嶺花

開又當炎夏之時其毒爲更劇也

舊志

案四時之氣如其方變則有應正月元旦望東方雲占風有黑雲矗立如竒峯數疊其年颶風數亦如之又有元宵內南風幾日卜颶風多少己卯日東風水陸皆利驚蟄懼南風諺云驚蟄南風寒到芒種風種叶音諺猶有古音之遺二月晝有南風夜無逾清明南風過洋始可航海三月不宜東風諺云三月東風曬草死南風陡起雨驟不崇朝忽至俗謂之西北母雨不雨則竒旱四月東風大作舟行多壞忽雨忽晴杲杲出日諺云四月東風吹衣是稻花時謂小熟忌

北風大熟忌南風皆以水火相尅孤陽不長令稻多秕故也四五月間西風過夜或過三日必有雨六月北風雨大至諺云六月無空北以非雨必有颶風七八月間西風半日溽暑不堪俗名西風燠主有雨久則無種物不利寒露不宜風有則穀不實諺云寒露風霜降雨盖皆忌之九月風颿起聲如濤湧諺云九月九無風無兩自己吼十一月作乾風而寒俗云之冬風霜冬至在十一月中旬則多南風諺云冬至在月首風霜年內有冬至在月中無霜無寒風冬至在月未寒到正二月是瓊南俗諺無一不叶古

音亦見自然天籟音韻自合也

采訪冊

風候

周歲皆東風秋夏颶風

舊志○按周歲八風俱有但東風多耳

投荒雜錄云南方諸郡皆有颶風颶風者具四方之風也按瓊夏秋間颶風或一歲累發或累歲一發或起東北而轉西或起西北而轉東皆必對時回南大作而後息將起之前海鳥預夜羣驚飛投黎山樹葉皆向南作翻轉之狀或海吼聲大震或天脚有暈如半虹俗呼破蓬卽嶺表錄所謂颶母或踰時大作暴雨挾之撼聲如雷拔木飛瓦居民皆矮屋避之人不能行立牛馬

瓊山縣志

卷二

輿地三 風候

三

不敢出牧或風雨中有火飛騰回南又最大傷損萬物東坡有颶風賦見藝文舊志

南越志云熙安間多颶風颶風者具四方之風也

一曰懼風言怖懼也常以六七月興未至時三日鷄犬爲之不鳴大者或至七日小者二三日

外國以爲黑風

太平御覽○按瓊地颶風將發鷄犬鳴之如常似不可以此槩

論

又云四時風候乖異風之暴者謂之颶風又有石尤風觸人皆感逆氣成病證行見雲脚疏謂之颶風路舟人徙舟避之又夏月暴風雨東北風起揚沙走石曰青凍此皆風之異者也其常

則南風爲多季冬先春而至曰送年南北風時發曰北暴諺云朝下三晚下七夜半下風無過日又曰朝北晚南半夜東以時占也潮長風起溯平風止以水占也

全上

南海秋夏間雲初慘然有暈如虹長六七尺則颶風必發故呼爲颶母見忽有震雷則颶風不作矣舟人常以爲候預爲避之

嶺表錄異

歲中有一鬼打節則有一颶有二鬼打節則有二颶鬼鬼宿也打節者或立春立夏等節值鬼宿也

粵中見聞

附論按颶有數種而並由於海氣瓊四面皆海故

瓊山縣志

卷二

輿地三

風候

四

於粵之諸郡爲尤甚其將發也先期一二日雲氣漫空而疾飛

本楊慎外集

而海吼水腥亦其

徵也及其發也沿岸數十村海水吞田而遠溢而垣頽屋塌則其甚也其發至累日者則謂之風颶颶聚而淹颶散而剽渾而一之謂

颶卽颶者非也

季麒光颶信歧颶與颶爲二諸說俱無分別至瓊俗於颶

風皆謂之颶韻書無颶字候考其發自他方者則謂之風

尾尾高而柔颶低而暴比而同之謂尾卽颶者亦非也蓋颶無大小其發也必於所在之處橫衝直決號怒異常又每自時之午未達於次日五鼓而止六七月爲時而有爲時而

無八九月秋分有則寒露霜降並有秋分無則寒露霜降俱無故諺有一翁一婆一媒人之說土人每以鵲巢所在之枝上下占之鵲能知風十常九應淮南子亦云烏鵲識歲之然颶必夾雨偶有無雨而颶者則呼爲乾風颶必不雷故俗曰有雷不成颶然亦有雷鳴而颶者則呼爲鐵颶三水范氏云颶風作益以暴雨其勢彌烈謂之鐵颶而郡志採訪以有雷而颶者爲鐵今從郡志乾風雖最害稼未甚破盧鐵颶銳不可當物無不損此皆瓊南風候之反常者也此外又有暴風若龍興而致者土人謂之鼓龍風起則塵埃徧野林葉飛空其勢更雄於颶然倏然而起亦倏然而止船人忌之陸居者無患至若石郵勢逆青凍氣寒此等風隨處有之不獨瓊土爲然故不具論六書故颶補妹切海之災風也有偏旁似應从貝爲正李西涯譏許氏从貝謂具四方之風乃北人不知南人之候誤以貝爲具耳然今書多作貝不相沿已久當仍之

潮汐

朝曰潮汐曰汐抱樸子日月之精生水是以月盛則海潮大圖經曰潮汐往來爲天地至信瓊州潮候與江浙欽廉之潮不同其地勢異也郡與徐聞對境兩岸相夾故潮長則西流消則東流

日則消長常也八月九月其勢獨大每日兩有消長者其變也故舊潮漸減漸小謂之老潮新潮漸退漸大謂之穉潮十一月朔或時不測而長謂之倫潮其大小之候隨長短星不係月之

盛衰

舊志
下全

瓊海東南諸港朔望前後潮大上下弦前後潮小二至前後潮大二分前後潮小夏至潮大於晝冬至潮大於夜又云晴則瓊南而吼陰則望北而吼人以爲陰精驗之果然又云廣潮候與閩越相去亦少差而瓊崖儋萬之候大小俱各差殊其半月東流半月西流則同不係月大小之

瓊山縣志

卷二

輿地三

潮汐

六

盛衰

上全

余襄公謂陽燧取火於日陰鑑取水於月從其類也故月之所臨則水往從之月臨卯酉則水漲乎東西月臨子午則潮平乎南北朔望前後月行差疾故潮勢大月弦之際月行差遲故潮之去來亦合沓不盡又自謂嘗候潮於東南南海見月臨卯東海潮平而南海未長月臨午南海潮平而東海已消皆不同時天台史氏伯璿則以爲謂潮水與月相應則可謂水往從月則不可蓋謂水與月皆物也而無相從之理此於襄公說中或有意外之見云

上全

郡守賈棠云舊說謂海潮與月相應月爲太陰氣感相從故月上潮亦上余常察之亦有不盡然者且朝潮汐汐晝夜兩至月上潮亦上是矣乃月落而汐又至不知於應月之義何居論者又以爲天地呼吸之氣然天文家推日月薄蝕五星遲留退逆皆有常度不爽毫末獨於潮汐迄無定論蓋未可以臆測矣余觀潮汐之生必自東來而說者又以爲潮生於北北方坎位天一之氣潮所從生然以宇內形勢論之北自遼陽南抵於粵歷五省而遠萬里雖潮汐奔騰迅駛亦必由近及遠南北各省自有先後次第安能

同時並至不移晷刻乎考宇內輿圖遼陽直隸山東江南浙江福建諸省皆東臨大海而潮汐之至無先後之殊其爲東來無疑獨瓊郡之潮云隨長短星不與月應又云潮長西流潮落東流又云雷瓊兩岸東西異流南岸水流東而長則北岸水流西而消北岸水流東而長則南岸水流西而消同在一海不應兩岸異流以余觀之皆地勢使然也考大地自北而南至粵省則南地已盡粵自潮郡迄瓊西行五千餘里皆南面臨海潮汐東來越五千里而西雖使飛免行天亦需一二時始至豈得與東南諸省較時刻

乎則瓊澗之不與月應宜矣觀瓊郡潮長西流潮落東流益信自東而來返東而去耳舊志載余襄公謂常候潮於東南海月臨卯東海潮平而南海未長月臨午南海潮平而東海已消信此說也則瓊潮之消長皆後於東海矣豈非因遠而遲之故乎若與欽廉之潮不同以欽廉又處瓊郡之西愈遠而愈遲矣至於兩岸異流蓋由兩岸相夾使然夫瓊雷二郡對峙瓊居海南雷在海北兩岸相去百里而遙以大海潮汐去來之勢浩瀚無涯陡直隘地束之水勢驟急急水之傍必有迴流流於南岸必迴旋於北流於

北岸必迴旋於南試向溪流驗之莫不皆然而獨以瓊潮爲異者蓋小水易見而大海之勢難察也其云半月東流半月西流者或者各就南北岸視之耳若夫朔望前後潮大上下弦前後潮小與八九月潮勢獨大考之他省亦然乃潮汐之常性非地勢所得變者然則人又何必獨異瓊潮乎

全上

寰宇記云瓊海之潮半月東流半月西流外紀云海水止有消長殊無東西流蓋因地形西北高而東南下瓊雷兩岸相夾見水長上則以爲西流消下則以爲東流耳

參萬州志

瓊州潮每月不潮不汐二三日冬不潮不汐三四日八九月潮勢獨大夏至大於晝冬至大於夜二十五六潮長至朔而盛初三大盛後漸減十一二又長至望而盛十八大盛後又漸減潮汐長天下皆同流惟瓊海兩岸東西異流每南岸水流東而長則北岸水流西而消北岸水流東而長則南岸水流西而消同此一海兩岸異流彼逆此順然東流日僅二十四刻西流則計時有九又或數日不流蓋伏流也天妃廟碑言十六七八九四日伏流可渡至中流始有怒濤乃東西合流處所謂中洋合巢浪也過此可

勿戒心遇風順則半日可渡

本三水范氏○合巢浪今俗謂之分水洋

王桐鄉佐云海南潮候無所依准但准授時歷長短星爲定候而二星之說載籍無考本出於後世方伎家陰陽拘忌之書而授時歷取之世俗禁忌以爲參差不齊之星偶與瓊潮湊合蓋二星每月內推移無定而潮水消長從之自合朔歷上弦前後爲長星潮自望歷下弦前後爲短星潮逼星前後則潮長大至極漸過遠而潮漸減小至盡而將盡老潮亦常與方來稚潮相接逐日輪轉如環無端其春夏二季則星未至前三日新稚潮初生逐日長大至星日而極過後

二三日則漸退雖日有消長而水痕遞減一分減極以至後星將近則潮水不消不長此卽襄公所謂潮之去來合沓不盡者此是新稚潮初來與舊老潮相逼而然及乎前星老潮退盡而後星新潮復來長消同前秋冬二季又與春夏不同星過後三日新潮方生又逐日長大以至大極而止以後消長亦同前但春夏潮長在長短星前秋冬□長在長短星後二星所臨前後卽爲潮大之期不拘朔望與上下弦也長則西流消則東流日有消長又不拘於半月也八九月內各有兩長短星謂之雙星此兩月潮水獨

大九月尤甚又不甚退似乎每日有兩潮此二星之說適合海南潮候者也

節錄王佐候潮前後論

附論

按海潮應月諸家所見皆同不獨余忠襄之說爲然也惟瓊海之潮寰宇記則謂其隨長短星不與月應楊升菴以爲不可曉夫月者水之精也潮者月之氣也精之所至氣亦至焉則其與月應宜也星爲日月之淫氣而長短星又不在三垣十二次之列潮之來去乃謂其隨乎星可乎且隨一不見經傳之星可乎然而候潮前後二論言之不足而長言之先哲非好爲立異必舉其說而盡抹之持論

反不得其平且瓊潮既與廣潮不同廣潮又與浙潮有異豈能執西江之流以概南海執南海之流以概海外哉應月之說候潮者固不能易而溟之深者勢亦極則更旁參以二星之推移是或一道也夫迹必求其已然忠襄所言者迹也而桐鄉之論亦未始非迹也今將以爲潮隨月生而消長有時既不爽夫盈虧之節卽以爲星與潮合而宿離不貸亦足徵夫起伏之常說不廢乎隨星而旨仍歸於應月於諸家異同之論庶乎一以貫之而可以並存也夫

瓊山縣志

卷二

輿地三

潮汐

十一

瓊之海口橫渡至雷之海安計程約八十里海口

流水較海安早半個時辰

倪邦良流水指掌圖說○圖與今之流水

起伏日時久不相符故不載

瓊海分東西二溜凡渡海必候流水東海鳴則風

西海鳴則雨土人每占之以候渡又瓊海半月

潮長則西流海南易渡半月潮回則東流海北

易渡

粵東筆記

以歲之十月自朔至十有二日候潮朔日潮盛則

明年正月必有大水餘日以次推之皆然

通志

占厯

正月元日喜晴

俗語冬溼年加餐

二月二朝雷禁工

不作敢

以祈豐年 三月三雨天蠶損秧四月八乾蟲盛禾傷

端陽以雨測田不雨傷高田宜晚雨芒種以星候

種種蒔值猪尾犁尾星出則秧黃死 五六西風早禾正宜七七

夜雨禾穉卷耳登場以雨暘知歲祭竈以雞骨

占年冬至忌晴喜雨冬乾年溼農民不給歲除占暗觀明

天色明宜黑白芒禾他如虹霓占旱颶母占風海

爇占荒霜冷占麥五色雀占旱澇益智實占災

祥應驗不爽舊志

立春日微雨兆有年諺曰乾冬溼年禾黍滿田各

府皆然惟瓊州相反曰冬溼年乾禾米滿倉冬

乾年涇禾米少粒通志占歲

瓊山縣志

卷二

輿地三

占歷

十二

立秋日雷鳴節前忌節後宜諺曰雷跨秋有作無

收秋跨雷禾米成堆

瓊州以海水占年諺曰海水莫爇禾穀將結海水

其涼禾穀登場郝通志下全

春正月李桃花盛柔桑可採二麥黃老圃種薑剪

韭田功既興

二月雷發聲虹蜺見魚苗生蜺降於霧木棉橘柚

華是月也農功畢作

三月溫風至梅子熟檳榔包拆催耕鳴田蛙鼓吹

夏四月榴火明榕成陰紫菱照水樹蘭綴珠白雨

以時至俗曰半晴天雨早禾天

五月朱荔熟椰含漿蟬大噪鉤割鳴年早穀登場

早禾自播種始計百日可割俗名拋犁望

六月白雨足西潦颺母乘潮芭蕉垂荔奴早熟龍眼

曰荔奴早花者以六月六日可食是月也新穀既升亟播晚種

俗曰翻藁

秋七月秧針碧菽田浮蝴蝶營繭是月也暑始酷

爍石流金

八月本芙蓉華稜粟熟芋可剝粘始穫河鮪乘潮至

九月木樨瘴發紅蓓登白欖落嘉魚出於峽大粘

始穫菊有黃革

瓊山縣志

卷二

輿地三

占歷

十三

冬十月嶺梅開八蠶功畢橘柚垂實潮田盡登是

月也霜始下氣乃寒

十一月桃始華冬筍茁楓漸丹鷓鴣蔽葉山花時

茂畚田布種是月也農斂穀屯困涸塘以漁

十二月水仙來賓梅乃大放風蘭賀春春陽漸暢

草木萌動以上俱郝通志

輿地志四

疆域節序

形勝

風俗

方言

居處

瓊山附郭首邑東西廣一百五十里南北袤九十

里

舊志下同

東至文昌縣界一百里

西至澄邁縣界五十里

南至定安縣界八十里

北至海岸一十里

東南至文昌縣界一百里

西北至海岸五十里

西南至黎界二百二十里

東北至文昌縣界五十里

瓊山縣志

卷二

輿地四

疆域形勝

十四

形勝

邑治附郭土壤平衍山無險峻清流拱其前洋海繞其後馬鞍踞於右七星擁於左文筆三峯聳翠秀拔誠海邦一名區而州縣之望也明太祖稱爲竒甸豈虛語哉 按堪輿家言全瓊地脉來自交趾交趾與崖州相距不過百餘里海中巨石嶄巖橫入崖州至於五指聳拔如小崑崙又蜿蜒至瓊山而盤結秀甲一郡朱紫陽嘗謂冀州天下間一佳風水茲瓊山又是瓊郡中一佳風水今以形勢□之良然

舊志

風俗

地居海島習俗樸茂由唐迄宋人文蔚起至明爲
尤盛人嫻禮義之教士多鄒魯之風冬有青苗
田疇二熟婦工織繡蠶登八綿蘋芋多代菽麥
麩藥少佐酒醪地無虎狼野皆藤竹山行水宿
不擇處所亦宇內另一風土也 說者謂瓊自
東坡授學姜唐佐人始知學然按進士題名記
瓊在古荒服之表歷漢及唐至元宗朝文化始
洽宋祖草書混一人始知爲士慶歷間宋守之
知瓊州教諸生講五經於先聖廟建尊儒亭暇
日躬自講授人始知向學是則東坡未來之先
已敦士習也 東坡作伏波廟記在宋中葉時

瓊山縣志

卷二

輿地四

風俗

十五

文物斑斑已有足稱至明洪武間姚江趙謙來
典教事一時士類□□ 之文風愈振 鄭廷
鵠志稿俗醇民 書人守法度勤農桑
重遷徙女工紡織 刺紋原野不習火葬之
事老死不識刑名之□故邑多老人 瓊山平
原曠野水土頗善與廣□□大殊然地勢卑溼
物易朽蠹粟無二年之儲糧少隔宿之春地近
水人多聰敏執筆爲文衝口而出皆有可觀_{以上}

纂舊
志

蘇文忠云自漢末至五代中原避□ 多家於此
邱文莊云魏晉以後中原多故衣冠之族或宦

或商或遷或戍紛紛日來聚廬此處黃文裕云
郡城縣城營居多戎籍自宋元順化皆漢土遺
裔洪武以來軍士初撥則多蘇浙之人續撥則
多河之南北再調則又閩潮之產厥後中原各
處官吏充配者接踵而至故士族多□中州俱見

郡志

俗重檳榔親朋往來非檳榔不爲禮至婚禮媒妁
通問之後盛以大盒送至女家女家受之卽爲
定禮凡女子受聘者謂之喫某氏檳榔 郡城
海口非大家世族悉不親迎鄉村間仍以親迎
爲重 習尙重門第謹結納下戶奉巨室咸以

瓊山縣志

卷二

輿地四

風俗

十六

官呼之有新起家者故族猶耻與援 舊日冠
不三□婚多越度喪用浮屠祭用俗節及進士
吳錡尙文公家禮邱文莊著爲儀節士俗化之
吉凶弔賀往來郡城尤多近古今俗喪事
猶用浮屠 地

高田少處則種野禾或薯蕷粟豆兼粒食食之東
坡云海南薯菜爲糧幾米之十六 安土重離

旅遊者不三兩霜輒作旋歸之計 民務農工
少事商賈女專紡績少事蠶桑所貨各物如檳

榔飴糖米粟油蠟以及吉具

按吉當作古見
彭乘墨客揮犀

櫛

木沈香筍蓑等雜物均不出於本土然皆不甚
抵價值故產計萬金者城落無數家 郡城婦

女出入用柔薄草笠綰縛以蔽其面鄉村婦女出入用細滑竹笠裝戴以蓋其頭至若遠鄉婦女自昔好爲椎髻今妝飾頗與郡城無異城中商賈輳集易於生息致富然故家子弟安分者但坐耗其資不復知有生活計其奢蕩者則又狹邪酗酒聚黨呼盧故少有再承世者偏僻鄉落無他生意專事田園地或墮瓊如調塘符離演順等處卽自形其窘然勤勞儉約雖無甚餘積而一產一業尙可延及子孫但勤儉則鄙吝易生石地尤甚

以上俱參黃通志

鄉村故家世族皆自中士來瓊最重族姓修譜

牒建祖祠分大宗小宗無村不有置祭田捐祖款爲春秋二祀經費合族子姓同祭宗祠行三獻禮頒胙飲餼猶存古風族有族長以年老有名望者爲之子弟有悖戾者必罰族中有不平事必質之數十家便有蒙塾鄉黨中必有私塾以課十五歲以上者合族黨都圖必設賓興以爲學費考試之資俗重禮義廉恥貧窮者舌耕至老不肯輟業自同光以後土習漸漓無復同前質樸可以覩世變矣

婚嫁擇門戶自少時遂論婚禮聘視家有無猶行古禮自近世習尙侈奢婚娶論財富者禮聘

數百金貧者至少亦百餘金甚至再醮之婦亦百餘金或二百金不等皆其夫家父母兄弟族中兄弟瓜分其金更有恃衆奪婚毆傷人命者風俗澆漓一至於此可爲浩歎姻戚舊好數世猶相往來凡有喜慶禮儀相餽喪禮亦多賻儀居喪以哀戚爲禮有不從者必招物議惟喪用浮屠仍沿陋習不改停棺擇地延請地師苟得吉壤遠在一二百里費或千數百金亦所不惜更有謀人祖地偷葬名人墓墳致相涉訟傾家破產所在多有

方言

瓊山縣志

卷二

輿地四方言

又十七

瓊人語有數種有官語卽中州正音縉紳士夫及居城廂者類言之鄉落莫曉 有東語略似閩音 有西江黎語似廣西梧州等處土音 又崖州有邁語與廣州相似要皆商賈遺裔也故謂之客語 又有土軍語地黎語乃本地土音大率音語以郡城爲近正

舊志

繞郭人家所言者俗謂之客語東北一帶都圖語音與郡城同西南一帶都圖居石地者盡言黎語其不居石地者黎音十之四客音十之六客音止一派黎音分多種非習聽者少有龍解

新

居處

瓊地枕山席海多海溢颶風之虞故公私室廬不爲高敞然規制與內地畧同 近海者與蜚人雜處常苦水泊風飄附黎者與黎人雜居不免

巢居尚處 舊志

山農耕種於野構茅守之其名曰芎 音寮參廣東筆記

民居一室兩房棟柱四行柱之大者圓徑尺中兩行嵌以板旁兩行甃以石俱係碎石用泥甃成富者加以灰墁其木以石梓波羅蜜爲上胭脂海梅次之若杉木則來自潮州黃稜則來自外國皆木之入格而可購採者 昌江筆畧增

節序

瓊山縣志

卷二

輿地四居處節序十八

立春前一日府縣官至東郊迎春館街坊各扮雜劇會聚俟祭勾芒神畢前導土牛自河口過南橋從西門入府人爭撒豆穀謂可消痘疹親鄰以春餅相饋遺自元旦至四日各相拜賀初三日書帖釘赤口謂之禁口六日後坊間村落行儺禮設醮迎神懸符逐疫立天燈作鞦韆每夜張燈或爲鰲山諸燈名稱不一每夜羣遊於煙火環街出謎燈用糯米製丸謂之元宵以貽親鄰元夕鄉落二三十里者咸入城聚觀郭門弛禁各處會首集衆作上元道場建旛結綵爲鰲山祝

聖壽祈年豐親朋其香花佐供奉列金銀綵□爲賀以
豐者爲榮二三月授墓添土剪除荆棘謂之撥
墓清明家家折柳於各門戶神堂插之四月八
日浮屠氏以五香和蜜水浴釋迦太子佛謂之
龍華會以浴佛水分送檀越鄉落以木刻龍祀
本境廟中競唱龍歌拋鷄入溪水洗之謂之洗
龍加以繪飾端陽節自五月一日至四日各迎
木境之龍於會首家唱飲先密作歌賦以帕結
之懸龍座前獨露韻脚一字俾會中人度韻湊
歌得中歌句者按字多少以錢扇如數酬之至
五日各村之龍咸會大溪競渡奪標兩岸男婦
聚觀郡城於南湖及海口港內彩扮龍舟或結
綵船沿河唱飲親朋以角黍相饋遺孩童小女
各繫香囊綵縷纏臂塗雄黃飲菖蒲酒折艾懸
門採草花相鬪較勝負取菖蒲及百奔有香氣
者浸水沐浴士伍跨馬挾弓矢會教場插柳枝
較馳射名曰剪柳城中人縛竹爲船用五色緋
糊飾鳴鈺鼓沿街作競渡狀名曰早船兒童鬪
蟋蟀十一日扮雜戲迎關帝君會十三日畢集
廟中賽愿祈保者各帶枷鎖有執刀竚立王像
前三日者謂之站刀甚有剪肉焚香腰臂各刺
箭刀者六月六日祀竈晒衣祛蠹七月七夕乞

巧用綵色緋糊製冠履衣裙備牲醴祀祖先謂之燒冥衣富家齋醮焚緋衣以賑孤魂十五日城落寺廟作盂蘭會八月望翫月製麵爲團圓餅蒸天南星去皮食之小兒引蜻蜓爲戲九日士民攜酒登高或咏賦兒童作大小緋鳶鬪勝又截木相擊爲勝及旋圓木引繩相賽名曰得樂間用竹崗爲之名響噫冬至交相賀臘月二十四日取竹枝埽屋塵換爐灰是夕祀竈宣竈經送竈君朝帝除夕設酒殽祀祖又謂辭歲子婦輩盛列酒饌供父母圍爐夜各燃燈門外焚辟瘟丹放爆竹一鼓復設酒果迎竈君將掃塵竹

篠及敝帚塵土盛以舊籬內燃燈列饌送之郊外謂之送窮家人燃燈共坐不寐夜分挂楮幣貼門聯易門神桃符節序所尙類如此

舊志

元宵滿城婦女盡到總鎮衙前折取榕葉謂之偷青或燃香城門祝之以祈有子孩兒則摩總鎮衙前兩旁石獅以祈平安好事者懸謎燈於門首遊人聚觀測中者酬以筆黑烟草 正月下浣鄉民競擡本境之神以與鄰村所祀者相會因而割羊擊豕聚會飲酒唱演土戲謂之裝軍其聚飲也卽素不謀面之人亦喜延之八會五月念七日六月十一日迎府縣城隍神兒童

則荷紙項械厮役輩則裝爲叫化子笠上採戴
各色草木之花以別之 七月十五爲中元節
延增道建醮放燄口賑孤魂相沿既久有好事
者廣勸捐題籌集鉅款有數千金者有萬數千
金者開大道場延僧徒數十俗謂齋壇道士數
十俗謂道壇旛燈結綵輝煌耀目並用紙造玉
皇臺十王殿五百羅漢高搭綵棚分建各街坊
演土戲三四臺通衢棚蓋白布爲幃新色洋燈
異樣人物誇多鬥靡無竒不有懸於蓋下燈光
燭天歌聲沸地遠近男女游觀晝夜不絕人山
人海舉國若狂俗謂作大元亦有借作元之名

從中漁利不畏人言廣開攤館多收陋規借賭
場爲道場傷財害民爲地方蠹始風行於各市
光緒年聞海口商家郡垣紳耆互相效尤日甚
一日甚至時非中元任意建醮自七月至十二
月無月不有自開賭後逢場作戲開場建醮志
在歛財貽害無窮其禍甚於洪水猛獸安得賢
二千石嚴爲禁絕力挽頽風 中秋有月解戲
文者使童男瞑目立於月下持咒誦之須臾如
醉如癡而步履往來能隨其所唱之聲而各肖
其人以出謂之闕月又謂之瞽目戲但聲不宜
寂一寂則張目而醒 冬至釀黑芒稻米爲酒

藏之踰年而後用謂之老酒村農掘薑於城市
貨之謂之冬至薑增新

瓊山縣志卷之二終

瓊山縣志

卷二

輿地四節序

二十二